

靖康要錄

一



靖康要錄
二



靖康要錄
三



靖康要錄四



靖康要錄(五)
西夏事略



靖康要錄

一

撰人不詳

中華書局

靖康要錄

二

撰人不詳

中華書局

靖
康
要
錄
三

撰人不詳

中
華
書
局

靖康要錄 四

撰人不詳

中華書局

靖
康
要
錄
五

撰人不詳

中
華
書
局

靖康要錄

此據十萬卷樓叢
書本排印初編各
叢書僅有此本

刻靖康要錄敘

靖康要錄十六卷。不著撰人名氏。舊本題曰孝慈淵聖皇帝要錄。四庫全書本題曰靖康要錄。與書錄解題、文獻通考合書錄解題曰靖康要錄五卷。不著撰人名氏。自欽廟潛邸迄靖康元年十二月事。文獻通考同文淵閣書目亦著于錄。注曰二冊。愚謂書名孝慈淵聖皇帝要錄。直齋、貴輿、皆宋人。不應改題靖康之目。且陳所見本訖元年十二月事。今本記事記言至二年五月一日高宗卽位止。多寡懸殊。起訖迥別。非一本也。四庫全書提要云。考書錄解題載欽宗實錄四十卷。乾道元年修撰洪邁等進。此必實錄既成之後。好事者撮其大綱以成。故以要錄名。案歷代實錄題名。皆全載諡法廟號。今以舊本題名證之。其爲實錄節本無疑。提要所言誠定論也。文淵閣書目字字號別載宋朝要錄四十冊。註曰缺。恐當時每朝實錄皆有節本。今僅存靖康一朝耳。宋時常有刊本。近古藏家惟傳抄帙。是本凡遇聖旨聖慈御札等字皆提行。框字構字皆注御名。常從宋本錄出。惜展轉傳抄。譌奪幾不可讀。因取所藏三本互相讐校。又證以徐夢莘北盟會編、楊仲良長編紀事本末、陳均九朝編年備要、李惠十朝綱要、無名氏宋史全文、趙忠定諸臣奏議諸書。增補凡數百字。改正凡數千字。付之梓人。明知其誤而無可校正者仍之。別爲校勘記附于後。書中事迹多可補宋史之缺。王維儉撰宋史記。柯維騏撰宋史新編。皆未見其書。後有改修宋史者。其將有取于斯乎。

光緒十二年歲在柔兆閏茂霜月既死霸詒授榮祿大夫三品頂戴前分巡廣東高廉兵備道加四級歸
安陸心源撰

靖康要錄卷第一

孝慈淵聖皇帝御名道君太上皇帝長子。母曰惠恭皇后王氏。以元符三年四月十三日生於坤甯殿。九月賜名亶。授檢校太尉山南東道節度使韓國公。

建中靖國元年六月遷開府儀同三司興德軍節度使進封京兆郡王。

崇甯元年二月改賜名焰。八月又改賜今名。

大觀元年十一月詔曰朕荷天眷祐景命有僕承家之慶是生多男年近幼學未親師友因嚴以教宜及其時京兆郡王御名高密郡王楷可於來春擇日出就外學其輔導講讀之官宜以端亮鯁直有文學政事人充選以稱朕意記室翊善可如王友例令王答拜于是以祕書監蔡卞爲翊善左司員外郎沈錫爲侍講國子司業汪澥爲記室安德軍節度留後知入內侍省楊震提舉管勾本位大觀二年正月遷司空武昌軍節度進封定王八月以國子祭酒汪澥爲翊善起居郎翟汝文爲侍講起居舍人俞奩爲記室俞奩遷以起居郎石公弼代之會惠恭皇后崩至政和元年二月始詔太史擇日以三月己丑出就資善堂聽講詔以光祿少卿李詩爲翊善辟誰司業耿南仲爲侍講司門員外郎鄭修爲記室甲寅詔宰臣執政官許就資善堂見定王御名嘉王楷王迎揖于門升堂就坐王西向宰臣執政官東向送亦如之二年九月侍講鄭居中因奏事講筵乞講詔官至資善堂見二王許之四月鄭修卒以左司員外郎張叔

夜爲記室。叔夜罷。以符寶郎陳鐸代之。

三年正月。改官制。授少保。

四年二月甲戌。行冠禮于文德殿。或云福寧殿。先是御製冠議。降議禮局。載五禮新儀之首。至是始舉行焉。

三月辛卯。詔曰。若昔明王。誕受厥命。建立儲貳。以係天下之心。朕嗣無疆大歷。荷天之休。誕育元良。是居家嫡長子。御名年。逮志學。冠于治朝。百辟具瞻。主器之長。永惟宗廟之重。父子之恩。考循舊章。正位東宮。明兩作離。爲國大本。可以來春出閣。立爲皇太子。其建宮室。設官屬。與儀物制度。宜令有司討論典禮。前期辦具。以開邦家之慶。與四海共之。十一月己亥。詔皇太子慶會上壽。押百僚班。又詔皇太子謁廟時。許逐室行禮。

五年二月乙巳。制曰。若昔先王。必建儲貳。以隆萬世之統。以係四海之心。朕撫世承平。念國大本。適迫來孝。垂裕後昆。永唯承宗之艱。莫如主器之長。咨爾萬邦之有衆。聽予一人之告猷。皇長子少保武昌軍節度使定王。孝友得于天資。溫良成于日就。出學外傳。率履無違。旣冠阼階。其儀可象。方景命有僕。介壽考之萬年。而明兩作離。兆本支之百世。蔽自朕志。格于天心。孚吉大廷。用申錫類。夫慎乃德。惟忠惟孝。欽汝止。惟幾惟康。用克相于我家。以對揚于休命。可立爲皇太子。仍令所司擇日。備禮册命。丁未出閣。詔改其閣爲府。甲寅。有司備法駕儀仗。列于大慶殿。文武百官。各服朝服。立班于庭。執事官入就位。皇帝服通天

冠絳紗袍。御殿。皇太子冠遠遊冠。衣朱明衣。執桓圭以入。受冊于庭。以翰林學士承旨強淵明爲禮儀使。翰林學士王黼撰冊文。冊文闕。或云劉正夫撰。審如是。則禮儀使亦當用執政。宜和殿學士蔡攸書。冊殿中監高伸書寶。禮畢。太師魯國公蔡京率百官稱賀訖。又詣東宮賀皇太子。如故事。以戶部尙書劉炳。翰林學士承旨強淵明爲賓客。中書舍人蔡靖。陳邦光。並爲詹事。祕書監李詩爲顯謨閣待制。左庶子兼侍讀宗正少卿耿南仲爲徽猷閣待制。右庶子兼侍講祕書少監蘇桓改名煒爲左諭德。太常少卿葛次仲爲右諭德。國子司業曾楙。殿中侍御史華寔並爲舍人。知入內侍省楊震。董慤提舉左右春坊事。內侍容機。黎景年。全淵。張彥卿。周珣。王若冲。王珂。管勾左右春坊事。劉淵爲家令。皇甫僅爲承受。丁巳。備法駕謁太廟。奏免乘金輅及用鹵簿。止依常儀乘馬。至太廟。易朝服行禮。又奏乞免官僚稱臣。並從之。戊午。奏臣竊覩自昔東宮建司設局。張官置吏。往往竊有所擬。無所不備。考其執事。實無毫末。顯是慕爲虛名。徒費廩食。書曰。慎乃儉德。惟懷永圖。臣立身之始。敢不念茲。伏望聖慈詳察。應東宮官吏。不必具備。諸司庶局。頗令兼攝。至于閑徒冗卒。舊例有者。亦可蠲除。務從儉約。如此。則不惟臣少安私分。仍得清心省事。專精問學。仰副君父教育之意。又奏。臣昨就資善堂聽讀。尋常須候邇英經筵已開。方取旨定日。恭惟聖學高妙。羣臣莫及。躬御經筵。但欲遵承祖宗故事。非待儒臣講說。修輔聖明。如臣之愚。正當力學。不可曠日。豈應擬視經筵。兼臣問安視膳之外。過還府第。綽有餘暇。況不同往日。深在禁嚴。出入不敢自便。今欲乞聖慈。許令每日不拘早晚。但稍有閒隙。卽請學官赴廳講讀。所貴爲學日益。有以副聖慈撫眷之

意。

九月乙酉。詔皇太子遇天寧節。赴垂拱殿上壽。于親王前別爲一班。家令劉淵能。以梁平代之。

六年四月。以禮部尙書白時中。刑部尙書慕容彥達爲賓客。吏部侍郎劉煥。給事中方會爲詹事。太常少卿賈安宅爲舍人。內符寶郎馮楊爲家令。

六月乙亥。詔納故少傅恩平郡王朱伯材女孺人朱氏爲妃。令所司備禮冊命。是月癸未。親迎。癸丑。詔自今車駕行幸。皇太子免起居從駕。

七年十月。生子。爲嫡皇孫。封秩比皇子。以起居郎李彌大。起居舍人趙野爲舍人。彌大。野辭。以太常少卿柯葉爲右文殿修撰。國子司業魏憲直龍圖閣專其事。

八月。劉煥。方會罷。以左庶子李詩。右庶子耿南仲爲詹事。宣和九年。以祕書少監曾楙。祕書監王易簡爲舍人。曾楙遷。以國子司業程振代之。至七年。李詩卒。以禮部侍郎王易簡爲顯謨閣直學士。充詹事兼侍讀。上聰明仁孝。好學而喜文。自以地偏而望崇。每懷兢畏。講讀之暇。唯以鬆器貯魚而觀之。他事一不關懷。人莫能測也。

宣和七年十二月。皇太子除開封牧。二十日。差內使梁邦彥。黃僅押賜皇太子碾玉龍束帶一條。不許辭免。

二十二日。閣分大內娘子用小轎十餘乘。入東宮府議事。二十三日。申時後入內。內侍官黃僅傳聖旨押